

太保費文憲公摘稿

太常文憲公摘稿卷之十一

序類

送貴溪令常君述職赴京詩序

入周而聞緇衣之什則知鄭伯之政入魯而聞章甫之誥則知夫子之政入漁陽而聞兩岐之歌入蜀郡而聞五袴之謠則知張堪廉范之政蓋納言以觀治忽采詩以觀民風聽謠誦以審哀樂乃古今論治者之所尚不可廢也貴溪令長興常君原載茲將循比奉職入覲京師邑博吳時亨李時中李敬甫及耆英茂異之能言者各為詩歌以道其行其亦竊取此

義歟宏曩與君同為曲江之遊矜其為人近得告歸  
康旁邑與蒙河潤之福又矜其為政盖君之為人也  
慈祥愷悌有視民如子之心忠信明決有聽斷如流  
之才而其為政也密之以正將之以誠催科之中撫  
字存焉刑罰之中教化寓焉故雖不煦煦以為恩也  
而孤嫠窮困無不蒙其惠不察察以為明也而黠吏  
猾胥無所用其欺不皦皦以為廉也而苞苴請寄無  
以投其隙不僕僕以為勤也而鉅政小物無不當其  
可不凜凜以為威也而豪民右族無以逞其詐貴溪  
政繁事劇號為嚴邑而君特卧治之居三年釀為醇

俗薰為至和農安於野而年穀屢登士安於學而絃  
歌方殷商賈安於市而闐闐旁達行旅安於途而姦  
穴竄伏寮佐安於職而有廢具興思神安於祀典而  
妖誕屏息若君者可謂無負斯世無負於賢科無愧  
於民之父母矣予知諸君之作姑諫其質固非為過  
情之譽也今

上臨御日深勵精政事方大計群吏之治大明黜陟  
之典君茲行秉衡鑑者必署以上考則憲臺可仰取  
卽署可俯拾其及人之澤將覃於天下而不專於一  
邑矣然予竊有所感今天下王澤不流民生少遂者

郎星未耀而難其人耳間有賢如常君者則又驟  
遷數易不能竟其所施使蒙福之民如赤子奪之慈  
母雖有借寇之章挽鄧之歌亦徒付之空言良可慨  
也司國柄者苟能建久任之議凡守令之賢者一如  
漢家故事璽書勉勵增秩賜金必政成而後易之豈  
非生民之太幸哉予既喜常君之政為人所歌舞將  
去是而羽儀于天朝然又恐既去而思其遺愛者不  
能忘也聊復致拳拳之意云

贈醫師夏君孟厚序

所謂醫貴乎老者豈非以其閱歷多而有定見試驗

醫而有定守耶凡初學書者紙費學製者錦費學醫  
於人費人不可以多費則醫非閱歷多而試驗屢者  
尚足貴哉昔齊桓公伐中山夜迷失道管仲請擇老  
婦而從之樊遲問稼孔子以謂不如老農夫農之與  
醫無大損益於人而猶以老為貴況醫乃天下之仁  
術群人之司命烏可不貴於老哉夏君孟厚於藝術  
無所不學而尤以醫名醫於諸科無所不學而尤以  
外科名春秋已七十矣髭髭皤然談論亹亹不倦蓋  
所謂老於醫者也頃家君得癰疾甚危諸醫皆束手  
無策舉家惶惑憂惕食不能下咽予日夜籲天請以

身代獨君與朱銓者以為無恐而君主之尤力每平旦就榻診脉已怡然而退至其處劑則據古方內補之法不敢少置增損於其間旬且浹病勢未殺君持前說不少變傍人皆笑以為非愚則証其強者至而嗤之既又數日家君之疾果少差閑月起居如平時蓋方疾勢危急之秋譬則乘舟於重瀾鉅海之中驚風駭浪傾瀾摧擗舟中之人皆駭懼而度委身魚腹猶賴長年三老持舵不廢貼危之無虞於靜定之餘君於是有奇功我問之則曰吾閱是者數四苟攻而合宜無弗愈者惟醫多而藥雜則非徒無益而厚

之然則醫之貴於老不於是而尤可信耶子載筆  
玉堂以文學為職業然性頗踈懶於人之請輒以故  
辭置之獨以家君即安之故德君不能忘念惟贈君  
以言庶幾可以張君之功而道子之意且以君亦知  
重不辭者也於是乎書

送弋陽邑博洪君明卿序

昔有人言周公之富貴不如夫子之貧賤蓋以周公  
位冢宰正百工然賢如君與親如管蔡而不知其心  
則周公誰與樂其富貴而夫子所與共貧賤者若顏  
淵由賜皆天下之賢才則亦有以樂乎此也予嘗誦



之以為斯言即夫子所謂有朋自遠方來孟子所謂  
得天下英才而教育之之意其大而非誇者歟師儒  
之職甚卑而其祿甚薄自世俗志於富貴者觀之誠  
有不屑為者然苟能因其材隨其分盡其心以行其  
志如安定之在湖學推明躬用以泐其徒及其教之  
既成賢才輩出大有益於人國則名教之樂亦可竊  
附於聖賢之後其視苟富貴徒貧賤者其為人賢不  
肖何如哉莆陽洪君明卿以鄉貢進士來署弋陽邑  
庠教事者九年於茲矣其容貌莊而溫稱為人之模  
範其學足以待問而民信守夫溫故知新之訓其過

弟子員一惟恩義是尚而於財利尤不屑屑比歲  
來是邑之士登名鄉書者倍蓰疇昔倫魁之選昔所  
無而今有之若翰林庶吉士汪君抑之秋官方君行  
恕進士范君景賢鄉進士李君文衛楊君誠之陳君  
克一夏君時望李君汝章汪君器之皆嘗載名弟子  
籍中而其餘懷抱利器以應時之須者不可以一二  
計子面明卿者再未嘗見其嘆老嗟卑之態方且欣  
欣然以得士為喜明卿其庶幾能脫去世俗之樂而  
自樂其樂者矣今國家脩舉學校於師儒之職尤加  
意焉故其文行之優者試於吏部輒得補郡佐邑長

以究其長而英有志於進士舉者又往往得以入奉  
大廷之對以明卿之學之績俯拾仰取惟其所欲宜  
無難者使能因其材隨其分盡其心以行其志則隨  
試輒效且將無往而不樂也明卿北行有期文衛輩  
來徵予言為贈予故以其可樂者贈之蓋孔顏之事  
業曰師曰弟子云者固其職分之所當勉者也豈曰  
擬非其倫哉明卿尚益勉之

贈河南太史劉君博之序

驗封正郎東阿劉君博之頃以大夫入服闋北上會  
河南布政司右叅政缺冢宰鈞陽馬公遂以君薦今

體

政司即古之州牧也其職主於承上命宣德意以牧養乎斯民馬公掌握邦治蚤作夜思拳拳焉仰聖天子奉天惠民之意凡遐方遠郡與有撫綏責者必惟其人而况其父母之邦乎居為人溫潤如玉自登甲科官吏部即受知三原王公歷考功稽勲驗封百爾舉措付之公議未嘗意徇士大夫多愛重君者於是共賀馬公之薦為得人也或以地望論之疑君不當遠處外服予則以為賢者之志在於澤民而已中外遠近亦繫其所遭曷嘗為身而擇地哉予不能

通曉時事然竊觀藩臬之秩雖下其使一等而事權  
職務無大相遠凡兵民之休戚風俗之善惡無不當  
問按部所至守而下必郊迎屏候鹿趨而階跽喜怒  
異態而榮辱隨之是其所據不亦重乎一省之地分  
為數道道以一人守之而歲易焉守者有材鄙汙潔  
而政之興墜民之苦樂以之是其所繫不亦大乎足  
國之務在賦與役而其散歛取予一事之興不如一  
事之省民與國未必能兩便也是其規為措注不亦  
難乎君茲行在上非君子為官擇人之意以置其人  
大而難能者必其人校量內外而以出為

况中朝公卿起自藩服者十八九君之復入臺省者亦旦夕事耳凡與君同進士而仕于朝者爲年家之義相率餞君而必以言贈焉宏不佞辱載筆從諸君後於是乎書

送張天秩丞攸縣序

士君子筮仕之初惟當充其才勵其志求以能其官而已祿之濃薄位之崇卑不必校也夫才之賦于天者雖有限量然常因事而見志之所在才副之百里之途苟甘於偃息其遠猶燕越也晨起道路駸駸不已及晡固已達於其所欲往矣三軍之士勇怯不齊

蓋有畏敵如虎者大將援桴而鼓之親冒矢石以成  
寧旗斬將之功夫人可勉而能焉所謂有志者自有  
成非虛言也今之仕者既惟擇官於始進不復需效  
於終身祿與位一不如其所望則臨民施政必有無  
聊不平之意雖其才猷幹局有過人者亦將薈焉以  
阻苟焉以安况望展市四體益充其所負挾者哉盍  
亦思之萬鍾之祿或積於斗升三旌之位或起於莞  
庫古與今徃徃皆然吾何可甘於自棄而不要其終  
也耶使資厄於時進限於塗而無復高位濃祿之望  
苟能用吾才行吾志居是位也則必盡是職而受

急事之譏不及焉斯亦賢矣張君天秩於宏為中表  
兄弟而其學也實以予伯父少恭公及叔父淵貢進  
士雪峰先生為師宏髫年與君聯筆硯共燈火者寒  
暑屢易賴君麗澤之益為多君天資朴茂篤於問學  
為文有思致以之取一第無難也顧乃淹於冒監其  
才與志久未及施今茲叅選於天官宏意其展露所  
長超越沅輩遠甚佐上州長壯縣蓋其囊笥中物耳  
而又墜得攸縣一丞噫事之難定固如此哉昔人有  
余不負丞而丞負余之嘆才優志廣者固不屑於此  
也然予觀今日之事百里之民丞得而共理之一邑



之政丞得而參知之譬之兄弟令伯也丞仲也與昔之以嫌例不可否事者異矣士惟無志焉則已不然則勤政安民惟才是視其孰能禦之序進超遷惟才是論其孰能量之君行矣尚安其官樂其職勿校其始而要其終書曰功崇惟志固吾與君素所講習焉者也

壽封長史竹坡張公序

歲九月十有一日封長史竹坡先生之初度也先生之仲子廷哲以弘治庚戌進士授興府左長史而先生與其配素宜人俱受封誥之恩至是已十年其生

之年為宣德辛亥至是蓋四百四十甲子矣其季子  
廷賓以己未進士官上饒欲迎先生至宦邸庶幾伸  
戲綵之私先生不可且以書諭之曰吾老矣日與昆  
李子姪宴集笑歌取適山水甚樂也何以就養為哉  
蓋先生同產六人伯兄少叅公及弟蘆陵尹以蒙甫  
皆老于家而仲兄以文以時及幼弟常塗司訓以震  
或隱或仕友于之愛甚篤先生子四長史及上饒雖  
係於官弗克稱觴膝下而其伯氏景夔叔氏景燧則  
皆隱居幹蠱未嘗去左右且稽山鑑湖之勝足以縱  
遊觀江瑤海錯之珍足以供奉養先生以封居之貴

族望之華一觴一啜徜徉其間烏紗白髮耀映先後  
雖陽明天姥之仙莫或過之宜非廷賓所能屈致也  
然廷賓意猶鬱鬱間語予故欲假詞寓歸以為先生  
壽予廢筆硯久矣自愛不足補廷賓之所須然義有  
不容已者夫壽本於德玉璣之於黃流葛藟之於樛  
木以類而應其理然也吾夫子之言壽也必歸於靜  
言靜也必歸於仁蓋仁者萬善之長德莫大焉予雖  
不及升先生之堂而與先生之從子廷良君同為丁  
未進士又因廷良而辱少參公之愛頗深且廷哲廷  
賓交遊皆最久也因椿以知津因建慶以知方因仲

郢以知公權則先生之為仁以長者無疑矣而又安  
於家食不屑就養亦惟恬愉靜退無慕乎其外之心  
其享高年膺盛福豈偶然哉况廷哲輔翊親藩能效  
忠秉德以為維城之助而廷賓試政壯邑能奉公持  
廉以應列宿之光所以養其志逸其心而廷續方來  
之休寵者兩無憾焉先生之壽張氏之福蓋未艾也  
詩曰樂只君子萬壽無疆請以為先生祝

贈永豐令沈侯惟佩序

臣漸於忠子漸於孝忠孝臣子之當然也若忠足以  
承君之寵孝足以悅親之心則又人所深願而不可

無得者焉盡其所當然存乎已得其所深願存乎天  
已可必而天不可必也必其可必而不可必者亦於  
我乎應之其為可賀孰甚哉蕭山沈侯惟佩令永豐  
有年矣將奏課於天官卿且以家書其母衛孺人在  
堂年幾九十又得取道拜慶邑人愛侯莫不欲為侯  
賀而庠生余君舜卿介其姻正科上饒周君廷宣來  
懇予言疊疊道侯不倦曰侯蕭山名族也自宋迄今  
宦業不衰侯承其尊翁知足道人及衛孺人義方之  
教以明經領鄉薦來蒞吾邑必勤必慎惴惴焉惟所  
生之忝是懼吾邑俗頗頑獷號為難治鋤強植弱撫

亭有方振舉廢墜類有成績尤加意廟學支傾葺壞  
煥然改觀庠遊之士心德侯甚嘗署上饒邑事不旬  
月民吏畏愛遂有頌聲流聞當塗乃與剡薦古人未  
可知侯於今日殆可謂良吏矣且侯政暇念其尊翁  
輒動風木之悲以衛孺人年高不能就養也陟屺瞻  
雲无切感慕歲之十有二月十有二日實孺人設帨  
之旦侯婦率昆弟子姓稱觴膝下白髮綵衣輝映閭  
里未知天下之樂復何以加此也竊聞太史氏於循  
良孝友例見褒錄言可斬乎予素聞侯賢乃今得其  
詳矣昔人謂求忠臣者必於孝子之門而王祥孝子

也嘗治海沂竟致邦國不空之譔忠孝相須蓋萬世  
不易之常理也今國家以孝治天下沈君行位孝廉  
之舉孰不喜談而樂道之而况永豐之人士乎蓋侯  
乃邑人之父母而衛孺人即其大父母也必父母之  
愷悌而後其子得保其生必大父母之無恙而後父  
母得舉其職吾意是邑之人莫不欲孺人之壽如岡  
陵松栢不騫不崩庶幾久被侯之惠澤也侯茲行當  
書上考進崇階邑人其尚有借寇之章乎二君揖而  
對曰此邑人之意也足以為吾侯賀矣予讓不獲於  
是乎書

壽建陽衛指揮僉事致仕裴公八袞序

皇明之得天下也始於南服而其取南服也始於太平故郡之公署僧廬徃徃為哉

太祖高皇帝駐蹕遊居之所予北上取道至此將追考其當時創締經營之實萬有一可以補日曆政記之遺意郡之耆舊閱多而聞見廣固有能道其詳者乎或為予言梅坡居士裴公鳴鳳以指揮僉事老于家春秋今八十矣悅詩敦禮有古賢將之風蓋武弁之傑然者思一訪焉而公之大父子成實侯於天造草昧之初當



皇祖渡江拔采石克大平下建康子成皆與有勞勛  
裴氏世賞所由始也未幾為公懸弧之辰郡主周紹  
立先生偕別駕屠君監郡張君節推李君邀予往賀  
則見公儀觀山立談論風生坐自旦迄晡爵行無筭  
酒闌尚能與客戰壺矢無幾微倦態予甚壯之聞公  
當未仕時嘗侍先揮使諱謙者征貴州之草塘湖南  
之辰靖宣力四方無忝於桑蓬之示其意氣偉然可  
想矣茲惟恬嬉無事可以老也脫當瀕洞勸勸之秋  
意公奮行弔報豈在營中伏坡下邪仰惟我

皇祖起布衣成帝業舉海宇而躋之於仁壽曠古今

始一見之譬之木焉茲郡實其根本所在得氣最先  
而悠久以之予竊謂長生茲郡者常多被救飭之福  
甲於天下而况公之先又有勞於金戈鐵馬之役者  
乎其壽也固宜然抑又聞公之先揮使壽亦甚高公  
年四十始世其職則所謂三三為一道家所忌者  
果足擬歟彼盖以兵為不仁之器而或過焉斯  
不利其身與其後不知善用兵者仁同寓於其間除  
殘遏亂拯斯民於水火非仁者之功耶此我  
皇祖所以壽國脉於億萬斯年之久而凡與有勞勛  
如公之先者皆當無負於爰及苗裔之盟也公之子

今指揮僉事綸來徵予文予嘉綸之孝也於是乎書

壽李母黎大夫人序

壽何事於祝哉然九人於其所親愛者莫不欲祝之以壽蓋不至於期頤不已也必曰萬壽無疆而後庶幾足以滿其意願焉臣之於君則以是祝之若天保是已主之於賓則以是祝之若南山有臺是已公卿之於力農畝者則以是祝之若甫田是已是皆出於人合而非有骨肉之恩然相愛既深形諸禱頌亦有然者况子之於母喘息交通德擬昊天何以為報雖萬壽無疆殆猶未足以滿吾祝頌之私也太孺人黎

氏為太平郡推高密李君守儀之母年七十有奇矣  
正月二十日實其設悅之旦守儀縻於職守弗克歸  
膝下獻觴北望孤雲心旌搖搖以予交誼素厚也乃  
授意假辭將寓歸為孺人祝吾意守儀之祝孺人雖  
萬壽無疆猶以為未足也予聞孺人天性純懿事贈  
兵部右侍郎先生柔婉淑慎克脩內職先生棄養時  
守儀與其弟守敬皆在髫髻孺人恐家聲之中墜也  
雖撫之慈甚而為教孔嚴每夕從外傳歸必篝燈督  
其誦誦成化癸卯守儀昆仲果同領薦書克成孺人  
之志迨守儀之拜郡推也孺人愀然不樂或詰其故

則曰刑官人之司命也非練法律者不可居少失其  
平欲人無寃難矣其居家儉約不肯妄費一錢見守  
儀輦服用少華麗必戒之曰非儉無以養廉汝其慎  
之孺人之賢類如此昔柳母賢而仲郢勤於學雋母  
賢而不疑謹於刑崔母賢而玄晞甘於貧乏以孺人  
觀之古今人豈相遠哉况世之母氏能成其子者有  
矣未必能飭之以廉能廉其子者有矣未必能導之  
以恕而孺人兼之何其德之盛也德盛則福隨以盛  
而壽為之先有壽斯諸福畢備天道與善信乎其不  
爽矣守儀克體慈訓賢名籍甚旦夕且有顯擢而守

敬抱負利器方與天下爭先孺人之福蓋未艾也  
予不佞竊取詩人頌禱之義姑以萬壽無疆為孺人  
祝

東園文集序

東園文集戶部尚書仙遊鄭公之所作也公登天順  
庚辰進士科入翰林為檢討以親老稱疾歸養家食  
廿有餘年成化丙午始復起供館職由是出典學政  
入長成均累官至南京戶侍頃者屢疏引年上高  
其志加今職聽致其政而歸自其筮仕即以文字為  
業四五十一年之間舊稿之積殆將沒人蓋縉紳名流

欲假言以信今傳後者山鉅家刻壁陷筭藏往往干  
公手筆至於登高而賦斫地而歌興寄所到又未能  
鬱而不宣然其随手散逸者亦已十五六矣公之子  
主忠晚得其類存者萃為是集提學御史陳君玉疇  
公郡人也請而刻之將成宏適以試事至留都主忠  
託序其後時方困憊緣循未假作也及歸京師公子  
壻陳賁士在克復以公命見督宏忝竊甲科實公門  
下士也自顧謏陋雖不能為役然驥尾之附不度幾  
於千里之致哉蓋嘗思之古今以文章名世者非苟  
然也惟靜深有味專勤不懈而後能得之觀昌黎所

答李鄴書辭磨礪浸灌之功槩可見矣夫所謂浩乎沛然豈苟焉襲取而能致哉公材全能鉅無施不可居家以餘力贍其宗黨率鄉人為孝義之行仕于中外所至以政事著聞其文得之天巧特經濟之餘緒耳然竊觀公志亦可謂靜而專矣往年宏請告歸公遺書以早出為戒叙其少時嘗欲入武夷結菴人隱岩下讀書二十年而後出蓋學而能靜故其得之也深所謂既溢而流者也頃泛江道石頭城登觀音閣讀楣間公所留題主僧語予公入賀萬壽節阻風憇此中夜得亟起索燭書之必春秋不為不高矣而



豪吟健作若與少壯者爭能闢銳於筆硯之間何其  
勤而不懈乎茲集之富而工固宜後生小子所謂駭  
嘆而覩服也况公蒞宿意新茲歸享暑簞冬簞之樂  
無遊魚野鳥之猜日與隣翁田父頌天子之休德門  
生族人歌先王之遺風積以數年且將繼是而有所  
集云

賀監察御史張君廣漢考最序

君子學焉而仕固欲有所為於天下而施之廣狹恒  
視其職之崇卑此古人所以有為澤為川之喻也職  
可以遠施矣然必其才猷器識有過人者而後足以

稱之高墉之隼非弓矢素備惡能射之而有獲哉雖  
然其樹立究竟又顧其志高下何如孟堅車良馬千  
里之志宜無難者苟王良造父情而息焉亦未必能  
秣燕而刷越也故職之稱也存乎才才之用也存乎  
志人君之馭吏欲稱其職而已况御史為風紀耳目  
之司其職之雄峻固豈群吏可得而例論者乎夫天  
下猶一身然天子其元首也居其下而為佐者贊宥  
密則為心腹任夾輔則為股肱司出納則為喉舌效  
捍禦則為爪牙其餘與有毫髮之勞皆吾身之用而  
不可一缺者然精神風采獨於耳目乎是寄故京師

以達于微塞皆其所按行之地由巖廊以逮于筦庫  
皆其所刺督之人其職誠要矣使居是職者有可為  
之才有必為之志則中外百司皆將奉公憂國肅然  
於憲度之中譬之視聽聰明自足以檢乎一身雖旒  
垂纁塞可以遠見萬里而無壅蔽之患由是主威立  
而國勢尊民生安而王化盛其為施之大豈可以一  
二計哉博羅張君廣漢在御史之職三年矣而其考  
以稱書亦惟其志操之高才猷之美有以取之耳君  
發身最少而其所蓄負不凡出尹建陽興廢隆辨寃  
抑賑飢遏盜區畫井井如老吏事者政成而其譽大

者乃以憂去服闋改尹畿縣政因其俗而勤勵一如  
建陽於是有臺之召其試職也即侃侃有所論列不  
為姸姸顧慕尋奉命出按浙江江西二省屯田君陰  
求官屬之可用者委以檢覈之務而其旁諏審處必  
合事宜故屯得如故額而無繹騷之怨是雖未足以  
究君之才而君之所至固可見矣君還朝間嘗論二  
省官屬所取必愛民守已者未嘗以愛憎為賢否若  
君者於耳目之司可謂無愧矣而其考以稱書不亦  
宜哉端公楊君德夫舉故事謁文賀君蓋察友寅恭  
之誼也而予實君之同年友不可以不文辭乃為書

此并致區區之私喜焉

壽封君自拙陸公詩序

公世居溧陽自拙其號也以其子監察御史時休知臨川課最得受縣尹之封者於是將十年矣五月三十日為公初度之旦御史雖不得及其時稱觴上壽茲奉命使雲貴可便道遂其展慶之私以公雅好吟咏嘗有聲於詩社也乃干僚友作為詩歌將持歸供一噓之樂甲倡乙和遂成其帙爛乎文綵之盈篋也璨乎珠璣之在貫也洋洋乎金石之文奏於堂也御史謂子有斯文一日之知復欲有文序其首予嘗讀

瀛溪拙賦慨世之巧者多而拙者少也則遊心乎千古之上庶幾有嘿而寡言逸而知足德而無僞吉而有常者將取其言行而師友之然念夫耻巧宦之題者或不免拜塵之辱據乞巧之憤者或不免附黨之譏豈大璞既散澆風日熾而能守拙以自脩者世固難其人乎公之號既有取於自拙則其存心制行必能超越乎流俗而追逐乎古人使如公者而獲無疆之壽備可致之福豈不可以為後生小子之儀刑也耶為老莊之教者亦曰蘭之焚也以其芳井之竭也以其甘而櫟之壽也以其無用彼蓋惡夫巧者有激

而云然尔然君子之所貴乎拙亦豈椎鈍冥頑一無  
所取之謂哉務乎其所當為安乎其所當止不相時  
而射利不飾詐以釣名窮通得喪惟其所遇而不以  
已私參焉斯固巧者之所嗤而拙者之所樂也公初  
嘗治舉子業以親老已為適子不可遠遊以妨養也  
於是乎輟進取之謀而脩孝友之政及御史與其三  
弟既長而知學矣則因其才而教育之御史以明經  
早登甲科而曰微曰微皆駸駸乎縉紳之列其叔曰  
徹者亦以克家聞于鄉里嘗得公教子之詩而讀之  
於學必勵以修己之方於仕必勸以及民之澤和平

溫厚藹然正始之音也公之以拙自修於此可以  
見而其福履之盛自天祐之亦豈智巧之士可獨求  
而必得也哉語曰人無所不至惟天不容偽觀於公  
其益信矣公年既耄而聰明不衰進學脩德有少杜  
所不能及者幸際盛時朝廷方隆養老之禮庸詎  
知安車蒲輪東帛加璧之舉不復見於今日乎予固  
拙於修辭者聊以是為公壽

#### 四封錄序

婺源潘氏之子頃歲累累以進士起家前大理寺正  
令山東按察僉事珍舉于壬戌戶部主事選及郎中



旦舉于乙丑南京大理評事鑑舉于戊辰而兩戶部  
皆予弘治甲子應天主試時所取士也間手一冊謁  
予求叙其事予取而閱之其端三大字曰四封錄因  
從而質其詳兩戶部拱而對曰吾潘之老頃以子貴  
得封者有四焉茲錄之所由名也蓋自其輩行論之  
則選之父嵩陽處人與珍之父間菴公為兄弟旦之  
父直菴公與鑑之父南峰居士為兄弟自其封秩論  
之則間菴大理評事階文林郎而南峰與之同直菴  
為戶部主事階承德郎而嵩陽與之同自其所得  
論之則珍與旦以三年考績之最實庚午夏秋之父

興鑑以兩宮錫類之恩蓋是冬之十有二月也  
又曰頌之切者每難於自遂事之盛者未易於兼全  
惟潘之先有志於用世久矣嵩陽與南峰者著美負  
屈竟弗獲於一試而閒菴直菴儲書闢塾所以教子  
者尤勤延及選等乃始憑藉世積以充償厥願蓋非  
一朝一夕之故且珍與旦也筮仕中朝於貶封為易  
而喜悞之載猶不勉焉蓋選出江山鑑出諸暨則何  
敢厚望而幸皆內役適遭事會先後數月闔門受寵  
而又皆具慶在堂此於人間之事似為極盛焉者吾  
儕喜極而感惟侈上恩而昭世德焉是固不自知

茲錄之為誇也予又從而思之其言雖出于一時而  
皆發乎性情其事雖止于一家而實閱乎名教於子  
知其能篤於孝焉於臣知其能篤於忠焉於族里知  
其能篤於仁焉蓋守身者求以養親之志為善者思  
以貽親之名夫苟念身之所由立而名之所由成敬  
於始必不敢墮於終榮於前必不敢辱於後則令聞  
益彰而顯揚益大不但公卿之爵可貤於親而已也  
非篤於孝者能之乎一言之譽猶終身誦之一飯之  
德猶中心藏之况袞襲之榮賁于一門命服之章正  
于再世惟遭逢之不偶而報塞之當施則成戕之患

與生哉等而臣道之盡所以為子道之盡也非篤於  
忠者能之乎世降俗薄閭閻小人不知本原之為重  
而同姓之當以至於喜不慶憂不恤而相視為塗之  
人者豈獨此校乘之澤同歸于一幹舉遠之化必  
先于一鄉諸父群從交懽迭賀下以興鄒魯之俗上  
以禪堯舜之治非篤於仁者能之乎孝以基之忠以  
成之仁以克之然則潘氏之盛殆未可以今茲為至  
而茲錄且當屢見於他日矣諸君尚因予言而益懋  
哉

送憲副謝君德溫序

國家興自南服定都建業蘇松常鎮實股肱郡也其地帶江海而襟淮浙兇猾之徒往往駕大艦乘風濤規煮海之利因出沒攻剽為患蜂蠆有毒而蔓草難芻固不可漠然置度外其上供賦額當天下三分之一而田下濕所謂大湖者支分派接綿亘數郡春夏之交雨連日不止則巨浸稽天歲遂不登至煩發帑蓄留綱運以振業之而京師億萬口之所仰給焉者不得不升以與民此其利害有關於天下非獨繫於一方以時興革而先事備禦實存乎其人擇之固不可以不審而止之固不可以不專也吾友謝君德昂

以監察御史出按茲土深明憲體風采凜然其所  
以鋤奸剔蠱連折盜萌有大造於吾人又嘗特疏于  
朝欲䟽浚常熟江陰諸浦導水東歸以除汎濫之害  
於前二事之所當興革焉者蓋已有槩于中久矣頃  
緣山東殘寇流入江南一再越留都乘風鼓行假息  
常鎮境上言官謂四郡飭兵之事在浙憲雖有水利  
官兼攝而其任勿專今當增置一使即太倉置理所  
庶武備脩舉緩急可倚何所謂亮猾者誘募訓練又  
將入吾彀中不致於抵禦助逆重為民毒其閒暇特  
兼督水利以興農務民生既安則盜患亦當息廷中

議者皆是其言大宰遂菴公乃剡薦德溫往踐其任  
德溫之志之才固無往不宜而駿馬輕車於熟路尤  
便公之擇人固如是其審哉雖然自狼山之捷既聞  
談者遂譁然謂四郡可以高枕而戎兵可以投戈德  
溫之往亦可以緩帶雅歌無復奔走歎掌之憂矣吾  
以為天下之患常生於所忽而聖賢之訓常欲其過  
慎譬之愛身者即當元氣完固虛華充盈之時而攝  
養保護之功亦不可以少廢所謂鞭羊視後正以患  
生於所忽思而防防而豫猶懼不免而可以為無是  
患乎今四郡之民蓋已為逆懿所侵其元氣不可謂

之完固而膚革不可謂之充盈矣攝養保護方將賴  
於良醫德溫憂民如病又肯以為無足慮乎當元之  
季兵起沿江淮運使姝瓚言江陰通泰為江海之門  
戶戍將非人致賊艦往來無常宜亟選智勇以圖後  
功不然則東南財賦非國家有時不能用既而張士  
誠起泰州旋據有吳中諸郡京師告飢至遣使徵糧  
于士誠使因文瓚之言而能思患豫防豈有是哉此  
一方之利害而實有關於天下者於德溫之行一及  
之嗟呼當全盛之日而為先事之憂覽者未必不以  
予言為過也



遺德錄序

禮部左侍郎東萊七君維之有遺德錄錄其考贈通議大夫禮部左侍郎養浩先生及其妣封太淑人劉氏之遺德也先生與太淑人之德乎於族里播諸士林聞之朝著久矣其揚于庭則有褒榮之敷賁于几筵則有諭祭之文納于幽宮則有銘樹於墓道則有碑藏于家則有狀有傳哀挽于執紼則有歌有辭皆在斯錄皆所以表章遺德而可傳於後世者也夫人子之於親有遺業焉將傳而守之有遺器焉將傳而保之有遺書焉將傳而誦之而况於遺德乎故

曾知不明也知而弗傳不仁也不明不仁在恒  
而之而况於維之之孝乎先生初以明經領薦  
再試禮闈不利欲得祿養親遂司唐山之訓歷霍山  
故城抗郡所至以身為教口不言利諸生有貧而  
能婚塋者往往斥所餘賑之是其德之大者即歐陽  
子所謂養不必豐要於孝利不必博要于物其心厚  
於仁也惟太淑人之於先生有相之道而其德合焉  
故天之報之亦為甚厚盖錫之以胤則其子五人或  
隱或仕皆有賢稱而為之文學器業蔚為公望其孫  
曾二十餘人類秀穎不凡錫之以祚則其年皆踰八

十而食子之祿踰二十年可謂盛矣況先生捐館時  
維之為諭德秩終五品 上念春官舊學特賜之祭  
墓今茲太淑人棄養又賜祭如例且命有司併治塋  
域儀式得知今贈凡生榮死哀之典先生與太淑人  
無弗與者非盛德豈能致哉維之之於道德非徒錄  
之蓋思其親而不可見見斯錄如見其親且欲後之  
子孫因斯錄而覽觀慕效庶幾以永先生與太淑人  
之慶於無已也予既嘉維之之孝辱為同年且嘗同  
官子孫將世講焉於是乎書

送知霍山縣吳君時雨考家還任序

鄱陽吳君時雨以成化癸卯與予同領鄉薦屢上春  
官不利弘治丁巳乃拜廬州霍山令地故屬英山巖  
洞迴複囊奸狡盜有司者以其僻遠於覺察追捕類  
多懈弛其鄉豪黠去理所懸隔亦自擅斷無敢孰  
何於是乎柔服謹畏之氓多歲厚積之族至不能安  
居以聊生守臣乃請析為一縣以專治之未三年舊  
令以不稱罷歸代之者即君也君知其民俗頑犷非  
威令所能勝則遇之以淳誠狎之以平易凡利病之  
當興革者汲汲為之如其家之事然盜嘗犯縣郭率  
勵敢死士追奔數十里莫敢返鬪後以法擒其渠帥

餘黨駭逆桴鼓之聲遂絕公暇輒循行阡陌勸課農桑又勅築三眼石等堰以溉高仰之田歲旱而禱齋居虔甚家人守茹飲之戒亦不敢違蝗害稼以姚崇之策捕之而患猶未息也則率吏民詣于天請吞蝗以祈民命吞之至數十見者無不感泣有頃雷風交作大雨如注蝗悉墮水死人以為神君在縣至是幾十年百廢具興四民安業廩有陳腐之粟籍多新附之丁於撫字之職可謂稱矣而况設縣未幾化理為難其效能卓卓如是豈不賢於人遠哉夫自誇毗修飭者視君疑君未必能理茲壯縣也而君乃優為之

何耶蓋君之所存既本於誠誠之所感雖天地可動也鬼神可格也而況血氣心知實我同類以誠感之有不翕然而化服者乎昔歐陽子嘗謂吏猶醫也吏之良在便民而已鑿之良在愈病而已苟藥施而病愈則雖舉止生疎言詞塞訥固不失為良鑿政行而民便則雖無赫赫之名固不失為良吏以君觀之豈不為尤可信耶霍山之民嘗以君政績疏于朝使在東京必蒙勞來不息之賞如王成矣在東京必蒙悃悃無華之褒如劉方矣而君已一再奏計其階與祿猶未能少進於初豈用人者拘拘於鰕魚行鴈之格

而崇卑淹速常視其始進之塗耶抑獲上治民必信  
乎朋友而君之交遊無有能出力以爲之地者耶雖  
然守令爲治安之本真難於得人而尤貴於久任故  
漢宣宋文皆緣是致理而以謠言單辭數易守宰則  
光武不免於致譏君行矣霍山之民惧君之將迁而  
幸君之再至也安知父老不復騰借寇之章而其兒  
童不多騎迎郭之馬耶顧予於君方盍簪以道舊遽  
摻袪而言別後會何地情惡能忘故以是致區區之  
贈同予情者侍御萬安蕭君升榮秋官新淦陳君健  
夫貴溪楊君文淵皆與君同薦於鄉者也

送僉都御史柴墟儲先生之南京序

柴墟儲先生以成化癸卯發解應天明年試禮部復為第一於是隱然名動海內海內之士莫不傾心嚮往庶幾星鳳之先覩也時宏亦偕計入都實識先生於闡棘未撤之日其後留學大學先生未嘗以敗衄見棄所以期待特異於他人而宏因得屢承教益以為甚幸未幾先生官南京吏部識者有用違其才之歎蓋學問之淵博如先生文詞之深醇如先生使置之詞林冊府必能討論潤色以鳴國家之盛而無愧也然先生自視慊慊如無所能在南署篤志勵行不



猶流俗有所慕述力追古作者為徒而其名日益彰  
徹冢宰盧氏耿公知先生之賢不可久居散地也乃  
薦為北都考功郎中於是與先生同在部署者若今  
光祿孫公志同太常喬公希大提學蔡公介夫皆卓  
然魁傑之材其操存論議皆欲培養善類以備緩急  
之用而先生於考課黜陟必惟公論之合不遷於愛  
憎毀譽之私識者又知菴生之學可以見諸實用與  
世之徒以記覽為富藻績為工者異矣頃者先生自  
太僕寺卿進為都察院左僉都御史奉璽書往南京  
專理糧儲考功馮君子佩不能忘情於前政也念其

官請君子來督贈言宏雖忝以文字為職而學不  
加進有愧於先生其將何以為先生之贈況先生體  
兼衆器無往不宜志在匡時深明治體觀其布帛登  
進之始風簷倉卒之間已加念於東南之民力而欲  
卹之於無事之時則今茲之贈雖欲出所見以少效  
其愚豈能有加於是語耶顧諸君子之與先生於久  
故游從之中有先後交承之方平居道義之切蒞職  
業之圖議人材之諮訪蓋有賴焉一旦建旆而南誠  
不能無介然于懷者非託之文辭何以泄之而宏之  
感慨與諸君子同焉欬因是而發也雖然如先生者

豈能遠去 朝廷而錢穀一事亦豈足盡其用哉遲  
以歲月且當在三銓之地佐  
天子以用天下之賢茲其去也特拘於序進之塗而  
其復來也必有以慰吾儕之望矣諸君子聞吾言謂  
可以為先生贈也乃為之書

贈通守胡君學固進階致仕序

泰和胡君學固由陳留學諭課最陟寧波通守以內  
艱去乃改鎮江而治農其專職也君為人朴茂勤慎  
凡溝防之修築輒出力罔有弗均至於治橋梁創  
閘堰或須錢而辦者其數必由府會秋毫無與惟役

之督事已則會其餘以入于公用是工曹之治水者  
賢君憲臣之按治者賢君大臣之巡撫者賢君勞獎  
之及殆無虛歲至是且九年矣累日計資固當在叙  
遷之列君在郡數以疾辭撫按者知君之宜民也皆  
慰留不聽君乃假賀表入京以其情疏懇于

上當道賢之請進君階為奉訓大夫聽致其事而歸  
君於年甫六十及強壯之時而遂高上之志何其決  
也昔人謂去就之幾譬於食飲其飢飽寒溫取於自  
適不可決於人亦非人所能決而古今才智之士以  
官為家以去為諱有其言者蓋鮮矣有其心者加鮮

焉至於有其決者又加鮮矣夫榮辱得喪戰乎其中而軒裳圭組眩乎其外必位登三事而後足以厭其喜權之誇祿享萬鍾而後足以滿其殉利之慾此人之同情而世之公患也然側弁之俄常由於過醉嬰兒之病常生於過飽惟成功之於寵利也亦然故張良謝病二疏乞歸君子皆有取焉惟其達止足之分而不至於殆且辱耳若乃蕭望之顏真卿其清忠峻節高步一世而卒為奸譏所中論者惜之不以其昧於見幾之義耶即使遭遇日隆而罪責不及宜可以群趨旅進而無害也然年及矣而筋骸或不能強志

良矣而謀慮或不能周入辰出酉王事鞅掌曷若起居無時之為適左朱右墨簿領紛紜曷若觴詠優然之為樂東阡北陌杖屨往來視前呵後擁之仰給于人者孰勞而孰逸也暑簟冬氊睡餘支枕視鳴玉曳履之後飾乎外者孰贗而孰真也賢哉乎胡君可進而退未老而閒豈非有得於斯而無所繫焉其庶幾知足以周身而仁足以自愛者耶不然何其勇且決如是耶予與君父故方欲有以贈君而通政羅君允恕與君有連又為之請遂書此以重君之歸豈徒使鄉人子弟知君之賢為可法將天下之人聞君之風

相與慕為冲遊之行而於世道未必無萬一之補也

送中都留守司斷事陳君景昭序

廬陵藤橋之陳氏自宋以來為宦族入

國朝景昭之從高祖諱灌自其鄉率義兵見

太祖高皇帝於淮甸得授寧國太守而其從曾祖諱儼登景泰甲戌進士仕至刑部侍郎則景昭之尊翁也侍郎公為都憲時常奉命征貴州叛寇景昭侍行御史欲紀其所獲之功公曰吾可緣兵興為子孫貴富地耶事遂寢後景昭游邑庠為名士及公捐館景昭以恩任游大學學益有成蓋試於有司者屢矣而

屢弗利茲謁選銓曹試在高等遂授中都留守斷事  
將行其鄉友合浦令劉君叔溫來徵予言贈之中都  
南控江湖北帶河洛為我

高皇帝龍興之地猶周之岐豳漢之豐沛而加重焉  
留帥之設所以齊戎務壯皇威而固邦本其亦不輕  
而重矣然則景昭徃為之位庸可不知其任之非輕  
耶蓋拊揚蠡楚非帥所可親巧比微文非帥所嘗習  
於是以斷事佐之凡獄之輕重取舍帥惟總其要視  
其成而已是非曲直一有不當皆斷事之責也故必  
特之以公昭之以明使下之人於我有倚任之重而



後吾之職斯為無負矣以獄之所係尤為不輕古人  
論戰至于小大之獄或得其情而後可豈不以兵者  
刑之大也惟用民者能重其生於聽訟之時斯可以  
致其死於兵交之日乎今承平雖久而戰不忘也留  
司之帥於拊循士卒必能加之意矣若夫獄情之察  
必盡其心則景昭之所當勉也况先侍郎之勲名行  
業載諸國史而先太守又嘗於是乎有勞景昭勉之  
將不於國為能吏而於家為賢孫子乎

送知龍溪縣劉君師孟詩序

上饒劉君師孟以弘治壬子領江西鄉薦頃試于銓

曾名在第一往宰漳郡之龍溪翰林庶吉士李君子  
芳與師孟有連且同硯席契誼厚甚乃干士大夫作  
詩贈之而屬予為序師孟之先有諱養浩者仕宋為  
國學教授嘗遊黃勉齋之門從事於居敬窮理之學  
學者稱之為白石先生先生之孫諱光仕元為翰林  
國史編脩以其祖道本程朱為後學所宗請立白石  
書院於其所居之里置田若干畝歲入租千石以給  
其徒至于今故址猶存而子孫克守其業以明經入  
仕版者代不乏人蓋吾信一世族也師孟學有經法  
其存心制行務合矩度實無愧於先世使其遭時顯

用所立當不後人而乃歛厥才美施之一縣談者有  
遺恨焉雖然為程朱之學者嘗謂稷契伊尹之志可  
於一縣乎試之以縣於民最近而令之福澤及民最  
速故也故世有官居台鼎而猶未嘗作縣為恨者惟  
其志在愛人而欲得親民之職以行其所學焉耳然  
則師孟茲行其或無所恨乎夫仕不擇官而後能安  
其職能安其職而後能盡其心能盡其心而後於民  
之利病能汲汲焉為之趨且避之令之責斯無負矣  
師孟勉之哉天朝選用良吏方破常資益漸復前時  
之制凡士之屈於甲科者往往入居臺憲之任矣龍

漢之治行且復為第一吾見君之福澤不終施于一縣而已也

送魯府右長史吳君惟聰序

吳惟聰先生由國子學錄擢魯府長史司右長史予信之士游大學與惟聰縣桑梓締瓜葛素厚知愛者造予而請曰先生之才之行足以登賢科位臺省而淹於文學之職不得展布其所長在大學朝暮藝鹽與諸生無以大異今茲往佐親藩問其祿則下大夫之秩也問其職則國之政令無不得與焉夫以章逢之士起自草萊一旦得

天子之懿親朝夕密比其祿厚其職專且將以忠謹  
受知腰黃衣緋駸駸可冀不亦榮乎諸生欲有以賀  
之敢假辭於執事者宏曰是未足以為惟聰賀也子  
之所以為惟聰賀者有二焉蓋君臣相擇從古則然  
萬一相湏而不相值則雖潛心正學號稱醇儒如漢  
之董子置之江都未必能坦然自適况又有意外之  
慮乎今幸

朝廷清明諸藩皆奉法循理而魯王殿下尤以賢名  
宏忝禮曹竊觀其所上章奏一惟

祖宗之成憲是遵未嘗有非分之請國中支庶且多

以孝友節義聞 列聖嘉之數下璽書褒獎風勵古  
之曾王謂生子當置之齊魯禮義之鄉其信然矣然  
則惟聰之往日惟仰承睿意優荷寵渥而無事乎匡  
弼之勞此其可賀者一也士於髫年能誦論語等書  
即知尊崇孔顏思識其生長游歌之地至於浮泗達  
濟望岱宗鳧繹諸山隱隱然出沒於烟雲之表又莫  
不引領徘徊欲造其下第縻於行役未之能遂也惟  
聰今得遂其所欲矣至之日首謁孔廟恍然金絲之  
接於耳繼窺顏井而輒挹其餘潤紛華盛麗自不能  
動乎其中職務之暇從容登高以驗小天下之言進

修之念不敢以息而止豈非宦遊之一快事哉此其  
可賀者二也若諸生之云恐非惟聰之所以自賀也  
諸生以告惟聰惟聰曰願以為贈予遂書以贈之

送夔州太守吳君顯之序

聖天子嗣極以來勵精政事明目達聰凡吏治之得  
失民生之休戚雖遠而萬里莫不洞徹於冕旒之下  
故偏州下邑牧宰以不肖聞亟從罷黜而以賢且能  
者代之於是群吏凜然奉法以修其職而天下生民  
真有太平之望矣頃者夔缺守吏部請以都水郎  
顯之補之顯之少禮世家學有經法持心操

惟必端自其為廬州察推即有廉明之譽及擢  
工部郎中歷營繕虞衡都水才望益彰蓋所謂賢而  
解者也昔人有重遠之論謂川峽去京師最遠其吏  
之賢與不肖民雖譽歌而譏謗之不得遽聞於天子  
宰相之耳是以其民常苦於貪暴而莫之恤吾嘗疑  
之以為是特當時法令之不行而非遠之罪也若今  
日之事所謂階前萬里則譽歌譏謗可朝播而夕傳  
又豈有欺蔽之失哉是雖不肖之吏之所不樂而賢  
且能如吾顯之則固以為幸也夫蜀民至公於吏之  
賢未嘗不譽且歌之豈惟譽且歌之蓋有社而稷之



如李陽冰如文翁如孔明如張詠者矣冰之興水利  
翁之崇教化有愛於民民之德之也固宜若孔明與  
詠其治蜀皆以嚴嚴則民宜畏且惡之而乃得其心  
於百世之後豈非二公之嚴不至於苛酷之霜雪雷  
霆主於成物而其仁愛固寓於威令之中歟以顯之  
之賢且能吾意其惠利斯民以庶幾古之遺愛無難  
能者而或者乃謂政由俗革今之為政者貴於嚴則  
顯之其將何執乎嚴以濟寬如蜀之名臣使其民愛  
之不止於一時而畏之不止於力之所及此則予之  
所以厚望于顯之也顯之之仲父蓮使先生與少參

先伯公為乙未進士子與顯之有世誼之誼焉於其  
行不可以無贈也而顯之僚友王君憲之鍾君邦臣  
又以為請於是乎益不可辭顯之行矣方傾耳以須  
愛人之譽且歌也

壽隱思吳先生詩序

海虞吳隱思先生之子子聲白弘治己未進士出尹  
畿縣用薦入為御史未幾遂奉命按吾邦念自筮仕  
以來不獲承歡膝下以供人子之職者已十年陟岵  
之思徒切切於朝夕也茲行道出故里而六月二十一  
日值先生初度之辰以弭節之暇遂戲綵之私於計

甚便而於公亦無所妨乃命畫史繪圖懇中朝大夫  
上作為歌詩將持以獻諸先生而致其祝頌之意復  
介其同官徐君賓賢來徵予言序之先生孟文恪公  
之諸孫也公以文章道德稱重當世未仕之日其父  
沅陵簿被誣逮繫乞以身代是即古之純孝而其清  
忠直節寔於是乎基然位止中丞猶未能慰滿天下  
之望與世之薄功而厚饗者異矣有餘之慶宜於後  
嗣乎發之故先生之壽御史君之貴人固豫必其然  
不謂分所常然而不容以或缺者此可以見天道之  
公也而是父是子本於義方之教又有不可誣者使

先生之所存失其世守貴籒金而賤經訓喜貨貨而  
厭廉實則御史君幼而學也未必能成壯而仕也未  
必能顯欲圖今日之歸亦豈能致耶御史君登堂獻  
壽取諸君子之詩高歌以侑樽俎鄉閭姻戚聞之為  
父老者孰不厭幾如先生之壽而逮見其子之成為  
子弟者孰不厭幾如御史君之貴而娛親於未老之  
日哉將傳之他郡邑以及於四方凡為鄉大夫者孰  
不慕文恪公之賢而厭幾如公世澤之遠哉然則諸  
詩固有補於風化而非徒作者矣抑嘗讀詩之小雅  
至於四牡又知先王之遣使也雖欲其勤於王事而

又深探其孝養之情以慰勞之不求忠臣必於孝  
子之門而公義私恩不容以偏廢乎御史君懷歸之  
念於諸詩見之殆亦作歌來諗之旨歟其視文恪之  
於親雖所處不同而其為孝則一也由是移之以為  
忠而施之以為政臨蒞之下將不至有所父之怨鵠  
鳴之嗟而其事功名位又豈不足以追配前人之盛  
耶明先生齒髮尚壯聰明未衰繼自今屢受勅制之  
褒而永綏鍾鼎之養為可必矣

送太子太保刑部尚書東湖先生屠公致仕序  
聖天子即位之二年庚寅歲政學省諸大臣皆出簡

丁時嘉興屠公由御史大夫遷大司寇未幾再荷  
玉帶麟袍之賜遭逢之盛可謂千載一時矣歲之二  
月初吉公忽以老乞休詔不允且有老成練達委任  
方切之褒後數日公復陳乞而其詞益懇上察其  
情愍煩以政乃加太子太保賜勅慰諭俾乘傳以歸  
念其勤之久也仍命有司月授祭歲給後夫皆有常  
數又賜誥褒其先代而又其伉儷焉於是朝之卿士  
謂公之自處也不失乎進退之義而上之優老也  
克篤乎始終之仁莫不榮之然嘗為公屬者不忍公  
之遽歸也扣率詰予欲一言以為公贈若將以致其

緇衣之好焉蓋公自成化己丑登進士迄今已四十  
年所歷兩京更踐三司皆不離刑獄之任其處當之  
明決持論之平恕既足以為吏師而其聽斷之隙徃  
徃操觚刻燭與文人韻士爭奇鬪健無有倦意又所  
謂以儒緣飾者夫以公之材全能鉅如此晚生下吏  
領誨益而親儀軌為師父一旦舍而去之安能無介  
然於懷耶雖然又勞思逸乃將宦者之常情而難進  
易退又君子立朝之大節苟耽於寵利而不知止足  
則內必至於失已外必至於徇人上之不足以取重  
於其君下之不足以取信於其友所謂漏盡夜行狐

素黑袖蓋昔人之所交譏而互齟者也若漢之二疏  
晉之顓含唐之宋璟宋之范鎮見幾於鼎盛之日而  
辭榮於未及之年其高風偉節傳播後世視荀圖榮  
進於一時者孰優而孰劣也公春秋甫六十有三聰  
明未衰齒髮未改而乃力辭以去於許國之誼若有  
未安為世貪吝者亦不能若是忍也然敦尚風節以  
稍振士氣在盛世不可無人使公得從二疏諸賢之  
列其榮孰甚由是言之凡為公屬者可以釋然而進  
賀矣宏素辱公知公其有取於予言乎

送太守龍君舜卿之任太平序



舜卿吾表人其尊翁景昇先生以工書供事內閣者  
數十年累官至太常卿弘治初始請老歸未幾舜卿  
登庚戌進士拜祠祭主事再轉為主客郎中部長貳  
凡歷數公莫不才舜卿蓋舜卿生長京師既習知人  
情世態而臺省典故又得於家建議論之餘宜其才  
足以為也頃鴻臚尚寶光祿諸卿佐有缺舜卿皆與  
薦稿中使居外服固當叅大藩之政而於資序亦非  
過濫矣太平密邇南畿蓋所謂股肱郡屈舜卿往為  
之守得非以才望不立諸藩下耶古稱民為邦本  
而又以邦本之重而不可累非

其人也故凡遠郡皆必擇人以任之而況於畿郡乎  
先輩謂我聖祖興自南服功高萬古考其渡江之  
始首取太平當時駐驛之區用武之地故老徃徃猶  
能道之而復祖之詔軫念拳拳有子孫百世難忘之  
語然則茲郡實興王之根本焉為民之牧尤不可不  
得其人也舜卿則其人矣亦嘗思郡守所以為民之  
本之重乎夫郡以太平名固莫知其所始然予竊聞  
太平之義有二焉謂古者民三年耕則餘一年之蓄  
故三載考績三考黜陟餘三年之食進業曰登再登  
曰平餘六年食三登曰太平餘九年食然後王德流

洽而禮樂成此班孟堅之說也謂天有三階凡六星  
上階為天子中階為諸侯三公卿大夫下階為士庶  
人三階平則陰陽和風雨時順天下大安是為太平  
此東方曼倩之說也二說若不同而率皆歸諸民事  
蓋衣食足而後民生安民生安而後和氣應和氣應  
而後天象順其軌焉天人之際固當貫而為一也由  
是觀之則君之所以馭吏吏之所以行令而致之民  
者惟在乎敦本節用以開其衣食之源而又忍傷其  
財與力耶太平雖輔郡而地利瘠薄雨多則下濕病  
雨少則高仰病未聞有全豐之歲而賦役又重阻繁

亦云數矣以舜卿之才必能撫而輯之所謂賢  
人守京師憺懔河潤之福吾於舜卿乎有望是固  
小異周公涇川張公與郎署諸君則待之意也

送湖廣布政司左叅政劉君咸卓序

古故多賢才父子兄弟傳圭襲組者不足論也而文  
章勲業亦往往能世其家若大司寇雲菴劉公與其  
子方伯安菴先生居公卿岳牧中皆以清風高節有  
名當世其後與吾游而最稔者咸卓及其弟侍御咸  
栗蒞官持已皆無媿於前人咸栗蓋安菴之子而咸  
卓則雲菴之從孫也始咸卓在兵部見重於前司馬

東山劉公既而在禮部見重於故宗伯松露周公頃  
自郎中擢光祿少卿自少卿擢叅湖藩之政又用今  
當道之薦則咸卓之為才為賢固孚於公論而非子  
之私言矣夫人物之生囿於氣化不能皆才且賢其  
實頑桀鷲者常十八九有才且賢者出乎其間不  
固以化誨懷服之任付之而才且賢者亦宜以化誨  
懷服為己任誠不忍自有餘而已也故自古操用人  
之柄者其於賢才恒愛惜而保全之使之各得其職  
而無不盡其用之歎凡以遂天地生生之德也今蜀  
邑未平而湖藩壤地與之相接比歲飢饉民弗聊生

聞變和應所在蜂起使撫綏非人不能以化誨懷服  
為務而徒欲以威力勝之意外之患有大可憂者當  
道取咸卓於茲地得非以其才與識足以當撫綏之  
寄耶夫所謂盜賊者其初皆良民也因於苛虐迫於  
寒飢貿貿為求生而無術始猖狂結聚苟為免脫  
逃刑之計庶幾偷一旦之活而不暇恤手其他有能  
以化誨懷服為務安知其不反而為良民乎所謂以  
盜賊待其民其民始棄其身於盜賊以齊魯待其民  
民亦以齊魯之人待其身非文王之虛言也以咸卓  
之才之賢所至必盡其心所處必盡其道何俟於予

言之喋喋顧其行不可以無贈而通政羅君允恕以  
誼見督於是乎書以贈之若其辭支離而其意不白  
則以別懷之思有未能盡遣者也

### 世義堂序

正統間湘潭民大飢有司下令勸分攸人陳公德仁  
輸粟千石朝廷旌其門綽楔與然過者莫不義之  
其後歲再不登翁子銛出粟賑飢如翁所輸之數詔  
賜之冠服號為義民其後歲復不登銛子國器復為  
賑飢之舉粟數之輸于官者如其祖而名器之受於  
上者如其父焉三世一義傳襲惟謹譬之良田美宅

人利授受而不能舍可謂難矣於是御史俞公益為  
其堂曰世義以褒之亦以風勵夫不義之後也既  
而閭里弗戒堂燬于斃攸國器之子曰誥曰閭者復  
構而新之某之子伯頃入大學為諸生以為既我後  
人得世處斯堂而享其成實前人尚義之報不可使  
其善泯焉而無傳也介其友羅萬周來徵予序其事  
夫義之與利為公為私為清為濁如陰陽晝夜有識  
者類能辯之况秉彝好德人所同有宜世之趨義者  
之衆也然環觀天下喻於義者僅十一而喻於利者  
常十九利於己則不知恤乎人利於家則不知恤乎



鄉智圖力攫必厭其溪壑之慾而後已其在平時固已不仁甚矣荒歉之歲家袂而輶屨者方張口以俟黔敖之救而豪家右族幸灾射利乃閉糴以困之雖比隣親舊擠于溝壑者枕藉而煢然不加戚焉而獨何心哉用是較之陳氏祖子孫三世之好施而尚義誠可以為難矣雖然天於施報之間蓋有恢恢而不漏者吾嘗見專利之徒固能肥其家澤其室沉沉夏屋以為世業而傳之無窮然身死之後盡屬之於人一瓦之覆一楹之植子孫不能有也蓋當其智圖力攫之際識者已逆知其必至於此矣夫利者人之所

同欲也人所同欲而欲專之其能久乎若陳氏者祖  
考以義倡之於先子孫以義承之於後積而能施施  
而弗倦故其德於人愈久而不忘堂雖燬矣而曾玄  
肯構不旋踵而遽復且以伯之親賢好學必將顯其  
門楣以彰積善之慶焉然則為義者何嘗不利而彼  
專利之徒乃甘為不義之歸耶夫賢者於為義未必  
尚名而漸報也顧有實有名有施有報乃自然之理  
故予於慈堂言之亦將有所風勵云爾

送知饒州府宋君鍾秀序

昔漢宣帝謂使民安於田里而無嘆息愁恨之聲惟

良二千石可與共之今之知府即所謂二千石也識  
治體者知宣帝之言為不可易得非以其所處在上  
下之間而其情為易通所統適大小之中而其澤為  
易究哉然而能以循稱如漢吏者蓋亦難其人矣祠  
祭郎中宋君鍾秀頃用薦出知饒州府與之同為部  
屬者咸曰鍾秀在茲部凡四年於主客精膳儀制諸  
司之事罔不詳練不但祠部之優為也其性度閒雅  
容止溫恭而遇事克勤以慎故上下之交各當其可  
有譽重而無訾毀掎是以往將於郡無難矣又曰往  
年鍾秀在戶部嘗督居庸之餉虜入大同宣府又被

簡命從大臣社飭邊防是固乃觸絲棼而難於綜理者也鍾秀皆談笑而處之則於平時於內郡當卧而治又何足言耶於是相率登堂請言以贈其行寅長省菴劉公涇川張公謂予政務頗簡因屬予為之言夫軍國之需未有不取給于郡之小民者姑以鍾秀所嘗綜理者論之郊廟百神之犧牲幣帛則出於民也乘輿宮掖之饗殮牢醴則出於民也宗室戚畹之封拜祭塋四夷外國之郊勞贈貺則又出於民也至若邊陲疆場非常之變其供億之出於民又有不勝其困者上之人當責新取盈之日期會少稽則已憤

然欲加之罪而孰知閭里之間公私赤立有剝膚推髓之患哉鍾秀今知之矣而惟政之供不能損也然則宜何如處之母亦正身率物約已裕民去一切牟食漁侵之政以固其心而養其力則民可安財可阜而國用亦無不足矣昔倪寬初以負租課殿而其後卒以最書此漢吏之所以為循也鍾秀勉之予當為饒民賀信與饒隣予鄉郡也其將蒙河潤之福乎

送福建布政司右叅議裘君本厚序

諸藩舊設叅議一員以總理列郡之糧儲蓋專職也前此嘗以官多民擾而裁省之冢宰安定張公既膺

間命總領衆職思欲輔成吏稱民安之治以為今監  
司道分歲代視列郡有如傳舍或一事轉相付授首  
尾衡決事益禁弗理不若專以一人領一道治一事  
而後可責其成疏聞上嘉納之於是諸藩之佐皆  
有專職而所謂總理糧儲之官亦復其舊矣慈溪裘  
君本厚由主客郎中陞福建右參議其所理則列郡  
之糧儲也本厚以癸丑進士為行人嘗奉命使湖廣  
河南福建及遼周二府六年考最陞工部員外郎復  
往催荊州商稅所至以清謹聞既陞虞衡郎中丁外  
艱歸服闋改除主客主客之務雖淆冗可厭本厚從

容處之未嘗廢滯久而曾事益熟大宗伯南宮白公而下莫不重之茲徃來一藩之議益得展布所長宜足以仰副責成之望而無難矣夫治養相須兵民相倚豐凶相代有無相通蓋理與勢之不容已者故賦歛蓋藏在古具有成法而今日於此尤拳拳焉誠先務之當急也雖然民為邦本財為民心當是任者苟徒以亟疾相高而無惻怛愛民之念則雖可以取辦集之名書勤能之考萬一傷民之心而激意外之患亦豈朝廷專任責成之意哉予嘗讀明氏蘭絲之論而歎其憂乎民也深讀朱子

又其利

民也大夫二公皆閩人其於此以待於輿情  
所立之法必宜於土俗有能酌而行之雖萬世可也  
本厚天資多恕才足有為尚取致堂之語而驗之今  
日果有是弊乎則從而釐革之又考求晦菴之法而  
見之施行將見公家之利既無所虧田里之民各得  
其所邇本溪圖而上下相安可以為古之良臣矣本  
厚將行部之四屬欲一言為贈以篤同官之誼於是  
乎書

送廣西按察司僉事萬君廷介序

吾邑萬君廷介以己未進士為大理寺右評事歷陞



寺副寺正有年矣頃廣西按察司僉事缺吏部推君  
往補之僉事秩正五品而實居方岳之尊為列郡之  
表一道之刑獄輕重出入惟其所理蓋吏治之清濁  
民生之安否至於陰陽之和鑒莫不繫焉其任可謂  
重矣君居大理理天下之刑凡西曹郎吏憲臣所鞠  
之獄所處之常孰是孰非孰得孰失如持衡以較錙  
銖一無所爽其律其例可行可罷又朝夕參之伍之  
以求合乎時宜今茲之往信如駕輕車就熟路而王  
良造父為之先後也予得報甚為君喜意君未必不  
欣然而自得也或為予言故事寺正之權多得金

何為乃有是擢得非以君老成質樸而疑於  
遲鈍者耶果若人言予不獨私為君喜而且為廣  
人喜矣張釋之為廷尉天下無冤民非萬世理刑獄  
者之標準耶當文帝之幸虎圈喜齋夫口辯而欲超  
遷之釋之顧乃亟稱言事不能出口之長者其言曰  
秦任刀筆之吏吏爭以亟疾苛察相高其弊徒文具  
而無惻隱之實以致二世而絕天下土崩故於犯驛  
盜環之當罪必守吾法而不苟徇其上之意文帝之  
治至于網疎刑措未必非釋之之功而釋之之所稱  
長者殆亦今之所謂迂濶而遲鈍也自今之能者觀

之君誠為迂濶遲鈍然君於亟疾苛察之事非惟不能為而亦不忍為矧廣西遠在要荒治尚寬大慎斯術也以往豈復有鍛鍊羅織之獄鞫寃如痛之民而至於傷陰陽之和氣者耶夫刑之所繫重矣君子居是官則思盡是職而於班賁之崇卑不屑屑焉吾意君聞斯言又未必不洒然而自釋也會君之僚友吳君士元來徵予言為君贈予遠書以贈之